

LIS PREDICJIS DAL MUINI

di pre Josef Marchet - Udin, 1965

Marideçs di vuê

Stagjon di marideçs. E vuê indi vin vût un, che no mi pâr vere, in cheste glesie di Gargagnà di 'Sore. No sai ricuardâmi, in vite mê, che cualchidun al sei vignût a maridâsi culì dentri; ducj si lave a fracâle la jù, inte Plêf. Chei doi di vuê, a fuarce di navigâ, di tirâ, di sburtâ, a son rivâts a vignî a sposâju intune filiâl. Robonis po!

Juste chei doi di vuê!... Lui, un forest che jo no lu cognòs nancje par prossim e che in cheste glesie nol veve mai metût pît; jê, la Marinele de Slossare, che e je nassude culì, ma e je cressude ce ca, ce là, saio jo cun cui e cemût, par vie che si capin cence che mi spiegghi; e chenti e capitave cualchi dì vie pal Istât, fevelant par talian e lassantsi daûr une ferade di nasebon che ducj i cjans i corevin dacîs. Parcè àno fatis tantis vitis par vignî a maridâsi ca sù? Sepi Diu. Un caprici come un altri, un gri vignût tal cjâf ae nuvice, par vie de poesie rustiche dal paisut indulà che e je nassude... Si viôt che e je stade cualchi pôc a scuele e che e à let cualchi libri: cualchi conte di amôr, al ven a stâi... che i à dismot dentri vie lis tenarecis; o che dulà che e je a stâ no i comodave di comparî vistude di blanc!

O ai vût let, agns indaûr, su par cualchi sfuei, di cualchi cubie di mericans che a vevin volût maridâsi parsore dai nûi, montant sul svoladon, o dafonts dal mâr, lant jù cuntun di chei bastiments che a vadin atôr sot aghe; ma o crodevi che a fossin dome i mericans a cjapâ il matrimoni par un zughet e a messedâlu cu lis lôr matetâts o cu lis lôr strambariis. Ma cumò il vizi al è rivât ca, di ca de poce, e ancje i nuviçs di chenti a 'nd àn ogni dì une gnove.

O veis pursì viodût, vuê di buinore, ce comedie: jê a blanc e lui a neri e un tâl cul violin, che si è postât daûr l'altâr e al à seghetât bolzaris e mazurchis dut il timp de messe; un altri cul imprest di fâ ritrats, che al molave lamps ogni moment, di dutis lis bandis; une schirie di pulzetis e di siorets, che si son metûts di ca e di là, e par dut il timp no àn fat nuie altri dome che ciscâ e sgagnî: e dopo, dut il polam dal paîs a curiosâ da pît la glesie. Ce bieles funzion, ce devozion, ce serietât! E ce palotadis di graciis che il Signôr al à di vê strucjadis daprûf di chei nuviçs che a imbastivin une gnove famee cun chel biel implant! Alì ve si po crodi che al durarà a lunc il fogolâr metût adun in cheste forme! Lait a maridâsi là di Baduscli, se o veis di fâ cussì, malandretis di paveatis, che Diu mal perdoni!

Ancje se il plevan, par no che a nassin pastiçs plui grues di cussì, al si adate e al permet une vore di comediis di cheste fate, stait sigûrs che al capìs benon di vê dafâ cun int cence fregul di gnuche e di serietât: int che al è ancje dibat invidâle a pensâ e a considerâ, parcè che la machinute dai pinsîr le àn dissipade e fûr di ûs.

Doman messe aes vot e gjespui aes trê. O disarai a pre 'Scjefin che, prin di tacâ, al moli un sclip di benedizion a cheste glesie, che o ai pôre che chei di vuê a buinore la vebin disconsacrade, cu lis lôr pantuminis. E cun cheste us doi la buine sere.